

眞聖食世人食之增算四十除四百四病諸  
 天下臨玉女散華金童揚煙三界五帝日月  
 星辰神仙兵馬金剛力士一時齊到止善輟  
 惡名聞上清萬天歡悅一切獲福宜以此時  
 致齋也日中是諸天魔王食世人食之減算  
 九十生八十一病地官察身日昧時是諸地  
 魔王食世人食之減算一百生病九十一地  
 官宮門時是人間諸鬼神食世人食之減  
 算一百二十生病一百地官生罪惡鬼殺身  
 黃昏時是地下冥王鬼神食世人食之減算  
 一百八十生病二百眾害傷身人定時是餓  
 鬼畜生鄧都鬼神食世人食之減算五千生  
 四百四病萬害加身故鬼物邪精乘其飯食  
 入人腹中能生百病及諸眾苦一切厄難奪  
 人算命不得神仙長生不死若諸男女能依  
 我法各知所說凡食之時皆須先出諸食種  
 種於前一則獻仙聖二飴地祇三與鬼神四  
 及衆生起此四想是大慈惠免諸凶惡鬼氣  
 不侵散施鳥獸遍及蟲魚悉令飽滿獲福無  
 量生死受恩普濟又曰受食有向次第

道君答曰先須盥漱端身燒香行道懺悔禮  
 拜發願回向陳啓事竟然後受食閉目存想  
 身中諸神與三一同食食之時不得他人輒  
 動手有穢觸安徐咬嚼與氣俱進皆當手捧  
 清淨巾器勿教凡穢言笑喧聒是名法食始  
 曰清齋能依是言諸天降駕萬聖齊臨眾算  
 稱善玉女散華生死蒙恩得福無量

太上洞玄靈寶業報因緣經卷之四

太上洞玄靈寶業報因緣經卷之五 五

誦念品第八

大慈大悲普濟眞人以業報因緣請問  
 太上道君爾時道君告普濟曰昔勝喜天王  
 召道士女官三萬六千人妙化天王召道士  
 女官三千二百人妙德天王召道士女官一  
 千五百人清淨天王召道士女官一萬八千  
 人靈和天王召道士女官五百六十人淨和  
 天王召道士女官七萬二千人此六天王各  
 同時於其正殿建立道場懸諸寶蓋燒百和  
 寶香裝百寶座設百味飲食散萬種名華陳  
 綺綾羅諸帳布帛一百日中誦念此經依時  
 行道恭敬禮拜持齋燃燈晝夜不懈王與皇  
 后并諸王子宰輔大臣日夜燒香散華行道  
 布施懺悔國中男女臣人百官闈王建此福  
 田各自發心捨其居宅所有財物市諸香油  
 華果名衣上服種種法具來詣國門以用布  
 施供養道士願王國土安寧人民快樂先亡  
 者離苦生天道遠自在填滿道路王不禁制

任其本心各國中生獲法利年命長遠衣食無爲金芝玉英充滿園圃鳳凰孔雀遊戲山林男女欣欣惟有誦經時諸國王並壽千歲方升上界大臣宰輔各八百歲相次而遷七百劫來國人猶習道也

道君曰若國主有災誦念是經水火刀兵誦念是經星宿失度誦念是經日月薄蝕誦念是經陰陽不調誦念是經疫毒流行誦念是經疾病死亡誦念是經邪精魘魘魁惚人民誦念是經毒螫猛獸傷害叱民誦念是經或在牢獄之中誦念是經或得枷械枷鎖誦念是經一切厄難誦念是經若人命過誦念是經開度亡人上生華胥常誦是經九祖超昇凡誦是經功德無量各隨其力罪業消除生死蒙恩兆民歡喜天下太平

道君曰昔有一人受持此經晝夜誦念不倦於心時行山中遇諸猛虎圍遶左右競來搏噬驚誦是經虎即迸散無有中傷復有一人遊行海中風波振蕩身將溺沒誦念是經得達彼岸悉復安全復有一人身犯王法枷鎖

在身誦念是經牢獄解散不被鞭笞此經功德有大威力不可思議汝等男女各宜至誠信心敬奉克獲福利享祚無窮

### 行道品第九

道君曰若帝主國王人民土地一切衆生有諸災厄應當消却召請道士及以女官或千成萬隨其多少廣建寶壇懸諸幡蓋散華燒香燃燈照耀行道禮懺晝夜六時精勤不忘克得靈應福德普臻

道君曰三洞市七通滿人間行道建齋因儀立法人間天上久已流行今重說之畧示旨要一者太真二者金籙三者黃籙四者明真五者自然六者三元七者塗炭八者洞神九者神呪皆有所主隨事施行太真者普爲人天濟生度死滅罪消災請福祈恩延生注壽雲飛羽化法妙功深未出死生最爲第一金籙者天地破壞日月虧盈七曜差移五星失度刀兵水火國主災危疫毒流行陰陽失序安國寧人故爲第一黃籙者開度萬民億曾萬祖先後亡人處在三塗沉淪萬劫超渡地

獄離苦生天救拔幽魂最爲第一明真者正天分度調治陰陽辟斥凶災開度飛喪人天獲慶生死承恩感應諸天最爲第一自然者解免愆過致福延齡朝奏諸天傳度經法普度男女一切衆生無量因緣最爲第一三元

者學士修身祈年羽化開度七祖首罪三官削死上生延期保命爲人及己最爲第一塗炭者牢獄疾病考責幽魂苦病難堪萬救無效投告首謝生死愆尤解其危厄最爲第一洞神者命召天地役御神靈轉死成生回凶爲吉真靈潛應玄道感通度脫衆生最爲第一神呪者驅除疫病掃蕩妖精蠲却惡邪最爲第一所以分爲九者隨順衆生立其品次勅勒神仙令知禁忌遍爲人天功悉等也或三日七日八日竟歲燒香散華行道禮誦此經吟誦讚歎明燈照耀洞徹諸天供養三寶尊重布施開度人天功德巍巍最爲無量道君曰昔真定國王南和國王無量國王安樂國王逍遙國王自在國王平等國王清正國王尊勝國王同日各於王殿建一種行道

廣召道士三千二百人建節持幢摩序雅步  
散華燒香晝夜六時行道禮懺王與皇后及  
諸王子大臣宰輔親自供養設百味飲食燒  
千合靈香散萬種寶華吹九鳳之簫鼓五合  
之琴嘯神州之笙陳鈞天妙樂傾其府庫金  
銀珠玉衣服器具布施供養度國中男女老幼  
正第一相好分明聰明智慧及其王子公侯  
宰輔豪貴大臣咸使出家巨億萬許一百日  
中天下人民莫不歡慶讚歎供養不可思議  
紹隆三寶堂堂無比九百年中相承不絕王  
各仙化在梵度天中皇后太子及諸大臣各  
獲其福悉得生天逍遙快樂功德平等無有  
偏頗所以九種行道皆為第一

私誓品第十

道君曰學道欲離苦惱登無為境妙入慧通  
當先誓心心誓既定願念相隨內外感通真  
靈應接雲與羽駕自然而至到長樂境始會  
真常第一誓者先事  
本師元始天尊無上法王真應化身無極大  
道從身至身劫劫受生堅固不退造其形像

禮拜供養如對真容第二誓者大羅已下三  
界十方仙真聖眾入道位人皆悉回心常供  
本師燒香係念而不暫忘第三誓者凡諸聖  
教三洞大乘真道妙義生死法藥一字流通  
人天利益皆當抄寫金書玉字紙墨練素刻  
石漆書彫瓊瑤玉誦念禮拜至念在心廣布  
流行遍聞三界普使受持過去未來常不退  
轉第四誓者聖人化跡法教經行真道降臨  
神仙處所廣修靈觀大聖福基普為人天歸  
依窟宅第五誓者參經稟法一念善緣匠道  
我身有所利益凡諸仁者弘護法門廣布靈  
音教化愚暗玄冠黃褐與是出家皆發善念  
供養禮拜咨請妙義勤動不息第六誓者上  
自天子下至凡愚逮及三塗兼諸蠢動先當  
開度普出塵勞悉悟至真成無上道以此六  
者常誓已身我悉照知克令開度

發願品第十一

道君曰昔黃曾天帝本是棄賢世界凡人貧  
窮衣食不足常為貨役備經辛苦常發善心  
歸依大道吾遣化命真人開度能行六誓二  
十四年富有衣食更加精進萬倍於前二百

年中吾遣太妙真人授與此經得成仙人後  
到一劫天地運壞得為黃曾天帝香積國王  
亦是棄賢世界貧家女也常賃為役專心於  
道道士感其丹綺授與十戒能行六誓兼淨  
六根三十七年遇天大水轉身為男聰明智  
慧相好第一家大富有建諸功德供養道士  
寫經造像禮拜燒香布施救貧持齋受戒行  
道誦經二十八年功德遠徹轉更用心九十  
年中得生香積國王富貴之時三鳳下庭  
蓮華湧出宮中香氣芬馥遍滿王宮空裏芬  
芳八十年中得紹王統慈仁萬物清淨無為  
愛樂大乘三洞經典常與道士講論妙義廣  
度國人端正具足放遣出家建立玄壇大造  
功德心持六誓旦夕翹勤經五百年吾遣景  
玄真人開度今為太清北真天王得道真人  
塵沙之數未有不行六誓自誓心也

發願品第十一

道君曰吾有十二上願流傳下世作生死橋  
梁若善男子善女人能行之者必得如願第  
一願者願我受身生身所在託生得生人身

六根具足聰明智慧衣食豐饒年命長遠第二願者願我受身身所在託生得生中國不墮邊夷恒得安居莫遭兵刃牢獄拷楚毒害靡加第三願者願我受身身所在託生值國王有道天下太平五穀豐熟兆民安樂萬方寧謐率土無為第四願者願我受身身所在託生父母妻子親姻眷屬悉得團圓不中離別門戶昌熾子胤興隆第五願者願我受身身所在託生得聞經戒受持誦念禮拜燒香供養護持通達玄妙求為良藥救治病身內外熏修六根清淨第六願者願我受身身所在託生常值三寶大法流行玄匠神尊敷揚講說普令一切皆得受持通為人天生死法藥第七願者願我受身身所在託生值國主大臣公侯宰輔皇后妃主大建福田置立玄壇造大寶殿建大寶臺鑄大寶鐘造大寶磬作大寶座金樓玉閣萬宇千廊七寶莊嚴四界華整造經造像說法度人承此福田願得開度第八願者願我受身身所在託生願得出家玄冠黃褐躬行經戒

教化人間普救眾生免離生死第九願者願我受身身所在託生為帝主國王人民土地三塗五苦一切眾生所在之處建百高座廣召道士講說大乘三洞眾經宣揚玄妙悉得解悟俱入法流第十願者願我受身身所在託生常行布施寫經造像修營靈觀廣布福田老病貧窮飢寒鳥獸悉行平等求不慳貪第十一願者願我受身身所在託生天地清寧日月臨照星辰合度風雨以時草木不傷人民快樂第十二願者願我受身身所在託生克生淨土親承妙法自在無為羽駕雲車體入自然求歸快樂道君曰昔霄度天王是下界凡人常供養道士勤心不怠道士念其勞苦教行十二上願持經禮拜十七年中大得財寶廣建福田寫三洞大乘一切經典并譜帙蘊莊嚴寶藏請諸道士校勘轉誦十二年中功感於吾我遺三天玉童賜與金先草服之身生金光變化自在常行校度教化人間七百年中值劫運破壞天地化消又遺三天玉童以九鳳之輿

迎還大羅授與此經得為霄度天王

讚歎品第十二

道君曰善男子善女人見國主人王皇后妃主及諸王子宰輔大臣發大善心皆當讚歎不可思議若見寶觀廣立玄壇當須讚歎願早成就若見開度道士女冠當須讚歎悉離苦惱若見造像真應化身當須讚歎盡得虔誠若見寫經三洞聖教當須讚歎永劫流通若見殿堂樓閣臺榭當須讚歎善得皈依若見鐘磬金銀銅鐵當須讚歎警悟群迷若見講說數教妙理當須讚歎悉解幽玄若見誦念受持供養當須讚歎克悟道真若見行道禮懺祈恩當須讚歎福力普垂若見燒香禮拜供養當須讚歎必至道場若見燃燈光明普照當須讚歎幽暗未消若見持齋供養眞聖當須讚歎咸享福緣若見奉戒勸勤不懈當須讚歎具足六根若見布施遍及人天當須讚歎福德巍巍若見精進念念至誠當須讚歎不生退轉若見勇猛發大善心當須讚歎歎必得道真若見居家常誦經戒當須讚歎

雲駕來臨若見居家持齋奉戒當須讚歎上  
 聖聞知若見出家持經誦念當須讚歎克得  
 神仙若見出家燒香行道當須讚歎功簡請  
 天若見山林思真念道當須讚歎玉女來迎  
 若見華果衣服明珠當須讚歎奉獻天尊若  
 見男女相好端嚴當須讚歎並得出家若見  
 一切諸善因緣悉當讚歎俾家利潤普濟當  
 知讚歎善緣勸發衆生成就道心無量功德  
 不可思議是故說言皆當讚歎

布施品第十三

道君曰布施有三等功德無量人天得大利  
 益不可思議一者施法二者施身三者施財  
 施法者常以我法三洞經教善巧方便或權  
 或實或畧勸誘衆生體解正道俱入一乘總  
 棄愛纏登常樂境從劫到劫常轉法輪過去  
 未來常不退捨最為第一不可思議施身者  
 常當以身救濟一切囚徒疾病水火刀兵無  
 量厄中皆行救護以其方便不惜身形或割  
 肉飼鷹投身餓虎散苑鳥獸螻蛄蟲魚乃至  
 蚊蠅無所捨惜供養道士給侍所須遊山採

藥驅馳左右修營靈觀掃灑殿堂種種果林  
 造諸功德舉止施為不思勞苦常能不息惟  
 盡一心功德巍巍最不可計施財者有二種  
 善根一者內財頭目髓腦毛髮皮肉無所惜  
 惜以施於人二者外財國城妻子童僕牛馬  
 金銀珠玉綾羅錦綺玩弄服飾散施一切不  
 係於心凡有九種功德不同隨所發心皆獲  
 利益第一者施入道身真應化像見世富貴  
 功德難量過去生天仙天衣附體具聖接友  
 登手玉清第二者施入經法三洞大乘見世  
 興隆年命長遠後生天上快樂無為證果報  
 因入上清境第三者施入仙真聖相見世安  
 樂福祿未隆過去轉身得生天上更持經戒  
 昇入太清第四者施入玄壇靈觀樓閣殿堂  
 房廊增輝寶蓋臺榭見世門戶昌熾子胤興  
 隆過去託生五方淨土受生萬劫更得成真  
 第五者施入道士女冠山棲學道法衣法具  
 供養所須見世善神保護衣食自然過去多  
 生天王之門第六者施入常住香油燈燭莊  
 田僕役見世魔王保護厄難不干過去受生

國王之家形容端正年命長遠第七者施入  
 鐘磬幡華帳座供養法具見世諸天記名錄  
 善衆厄不干男女欣歡衣食豐足過去得生  
 豪貴之家第八者施入齋食供養出家法身  
 及持齋奉戒精進賢者見世不遭枉橫水火  
 刀兵邪魔疾病諸雜苦惱衣食豐饒男女端  
 正如玉過去生富貴之門第九者施入貧窮  
 孤寡飢寒疾病囚徒曠野餓鬼水陸有情一  
 切衆生見世衣食自然吉慶扶身災障不加  
 年命長遠形容具足衣食豐盈智慧聰明人  
 中敬仰普濟又問曰今日聞  
 天尊金口宣說布施功德生死獲福不可稱  
 量然上古之時人不布施各自豐饒亦無災  
 厄又復快樂今令布施未識因緣  
 道君答曰上古之人淳朴懷道抱德不貪不  
 欲各足於身但用至誠即能得道不須布施  
 自合天心下世時流人民矯詐惟求財寶不  
 識因緣賤命重財破國亡家內懷萬惡外結  
 兇狂相繼滅亡未曾自悟吾今是故令道散  
 之一則內賊不生二則外賊不起內外安靜

泉禍消除所以令其布施破此慳貪勝善冥通隨功受報昔寶山國王貪愛財寶金銀珠玉綾羅錦綺車馬衣服玩弄器具積無量數不肯布施賦斂無窮百姓飢寒人民怨酷共相聚結四面兇兵王與皇后及以子孫悉被傷殺分其財寶賊其國嗣更立善人又善愛山北有五百人同心結侶專行劫奪取其財寶殘害無數以快己身一旦王法收羅擒其徒類及以妻子斷其手足置在坑中日與一餐令其天下如斯貪悖破國亡家無問賢愚不可勝計或猖狂內發劫賊外攻天下愚愚豈能自覺我故念其貪著令遣施之除去衆生無量煩惱

道君曰太極真人者赤明劫初開身為道士受其經戒當發大心開悟群品講說妙義教化衆生不問賢愚孜孜不倦傳經受戒導引愚迷功德諸天名書金格一百八十年中尸解轉形還爲道士彌更勤苦接化下凡六十年中託生國王之家大建功德救貧恤死廣立善功三百年中晝在經堂天火化身乘空而去吾遣九鸞玉輿迎入四梵天中受與化形尸解之道又生下世妙喜王家更建功德白日昇天爲太極真人凡生死轉變一百八身或短或長三萬餘歲廣施戒法果證成真昔勝喜天王慈念衆生統攝王化三十三年投身餓虎即便轉形應得生國十六年中便登王位二十六年割肉飼鷹投身大海魚鼈口中形化飛煙直入雲中變作天女備受三洞寶經下生洞明國形容端正相好第一年前六歲便長齋奉戒別室誦經不交人事王念虔勤還作女冠宮中立觀建凌霄寶臺女乃登臺鼻吸不食四百九年八鳳來迎爲西明靈妃玉童玉女各二十四人出入乘天關空輪四萬八千年轉爲景虛真人昔安寶國王太施財寶救貧度死廣濟人民恩及草木供養道士衣服法具童僕凡杖種種所須五百年中形反成童大建功德放贖生命七百餘年尸解成仙人蓬萊山中修內觀之道湛然凝寂體入無爲萬八千歲今爲景相真人如此之比塵沙之量不可勝言粗舉一二以

相勸也子宜記之

太上洞玄靈寶業報因緣經卷之五